

**MAS : Doakan keselamatan penumpang dan anak kapal MH370**  
**Astro Awani**  
**9 Mac, 2014**

**SEPANG:** Malaysia Airlines merayu seluruh rakyat Malaysia dan masyarakat di serata dunia untuk mendoakan keselamatan pesawat miliknya yang hilang dalam penerbangan dari Kuala Lumpur ke Beijing sejak awal pagi Sabtu.

Lebih 24 jam selepas penerbangan MH370 itu terputus hubungan pada pukul 1.30 pagi, pasukan pencari dan penyelamat masih belum dapat memastikan kedudukan pesawat jenis Boeing 777-200 itu.

"Pada ketika ini, mereka masih gagal menemui bukti sebarang serpihan bangkai pesawat," kata Malaysia Airlines dalam satu kenyataan yang dikeluarkan awal pagi Ahad.

Usaha mencari di laut diteruskan sepanjang malam manakala operasi udara bersambung pada sebelah siang.

"Kami akan memberikan semua maklumat apabila kami menerimanya," tambah kenyataan Malaysia Airlines itu.

Perdana Menteri Datuk Seri Najib Tun Razak lewat petang Sabtu mengumumkan operasi mencari kini diperluaskan sehingga ke kawasan sempadan Vietnam. Operasi turut disertai oleh Singapura, Vietnam, China dan Amerika Syarikat.

Operasi itu juga melibatkan pertambahan pesawat Tentera Udara Diraja Malaysia (TUDM) dan kapal Tentera Laut Diraja Malaysia (TLDM) dan Agensi Penguatkuasa Maritim Malaysia (APMM).

Penerbangan MH370 membawa 227 penumpang termasuk dua bayi serta 12 anak kapal. Lebih separuh daripada penumpang adalah warga China dan 38 rakyat Malaysia serta warganegara dari 12 negara lain.

Sementara itu, tumpuan mengenai kehilangan pesawat berkenaan turut menjurus kepada kemungkinan wujudnya unsur keganasan.

Ia susulan laporan ada dua penumpang yang tersenarai yang sebenarnya tidak menaiki penerbangan tersebut; seorang warga Itali, seorang warga Austria.

Ketua Pegawai Eksekutif Malaysia Airlines, Ahmad Jauhari Yahya bagaimanapun memberi amaran kepada semua pihak supaya tidak membuat sebarang spekulasi.

Katanya, laporan itu diterima sebagai laporan dan perlu disahkan. Namun pihaknya tidak

menolak sebarang kemungkinan termasuklah ketika ditanya apakah mungkin pesawat itu dirampas.

Dalam pada itu, Malaysia Airlines sedang memantau perkembangan di Beijing dengan dekat. Ia mengirinkan 92 kakitangannya yang tiba di ibu negara China itu lewat malam tadi setelah berlepas dari KLIA pada pukul 4.30 petang Sabtu.

Kumpulan yang disertai sukarelawan itu akan membantu ahli keluarga penumpang yang kebanyakannya berada di China.

Malaysia Airlines juga menasihatkan waris terdekat mereka yang menaiki pesawat itu untuk berhimpun di Kuala Lumpur, dengan urusan perjalanan dan perbelanjaan ia tanggung.

"Apabila kedudukan pesawat itu telah disahkan, Malaysia Airlines akan menerbangkan mereka ke lokasi tersebut," kata kenyataan itu.

Copyright © Astro Awani Network Sdn. Bhd. 2014 (535275-D).

Source: <http://www.astroawani.com/news/show/mas-doakan-keselamatan-penumpang-dan-anak-kapal-mh370-31515?cp>